



مصلحتك أولاً..

وزارة المالية
مصلحة الضرائب المصرية

الدليل التعريفي لمبادرة الحوافز والتسهيلات الضريبية (الحزمة الأولى)

الإصدار الأول – فبراير ٢٠٢٥

 16395

شراكه – يقين – خدمة متطورة

مقدمة

صفحة جديدة بتفتحها مصلحة الضرائب المصرية مع المجتمع الضريبي، صفحة هتبدأ بمجموعة من الإجراءات والتسهيلات اللي هتحل كثير من مشاكل الممولين/ المكلفين اللي مر عليها فترات طويلة بدون حل، مشاكل بيعاني منها المجتمع الضريبي، وعبر عنها من خلال حوار مجتمعي عميق ومثمر، وكان من واجبنا إننا نتحرك بسرعة ونقدم الحلول الفورية للمشاكل اللي أصبحت بتهدد استقرار المجتمع الضريبي، ومن هنا إتولدت فكرة الحوافز والتسهيلات الضريبية اللي هتعيد صياغة العلاقة بين الممول/ المكلف ومصلحة الضرائب المصرية، العلاقة اللي هيكون أساسها الثقة والتعاون والمشاركة مش مجرد تحقيق الحصيلة الضريبية، العلاقة اللي هتكون فيها الضريبة واجب وطني مش جباية مفروضة على المجتمع الضريبي.

والإجراءات والتسهيلات الجديدة مش بتمثل كل الحوافز والتسهيلات الضريبية اللي بنقدمها، دي مجرد الحزمة الأولى اللي هيكون بعدها حزم أخرى هتشمل كل المشاكل اللي بتواجه المجتمع الضريبي لأننا في النهاية شركاء على طريق واحد، طريق بدأناه وهنكملة لحد ما نوصل لكل أهدافنا وأهمها رضا المجتمع الضريبي وإستقراره، وإن الصورة الذهنية للضرائب تبقى جزء من ماضي إنتهى مع فكر جديد ورؤية جديدة وإرادة حقيقية مش بس لمصلحة الضرائب أو لوزارة المالية، لكن إرادة لدولة بتحقق الأفضل دائماً لكل المواطنين.

فنحن جميعاً أبناء مصر الأوفياء

رئيس
مصلحة الضرائب المصرية
رشا عبدالعال راضي

□ تم إعداد هذا الدليل بهدف تعريف المجتمع الضريبي بالحوافز والتسهيلات الضريبية، حيث تُعتبر هذه المعرفة الخطوة الأولى والأساسية التي يجب أن نبدأ بها، وذلك من أجل تمكين كل ممول/مكلف من فهم كيفية الاستفادة من التسهيلات الجديدة، وإدراك أن وضعه الضريبي سيتحسن بشكل فعلي وليس مجرد وعود، وأن مشاكله الضريبية ستُحل بشكل حقيقي، لذلك، قمنا بتقديم دليل مبسط وخالي من أي تعقيدات أو مصطلحات صعبة، يشرح التسهيلات الضريبية بلغة سهلة ومفهومة للجميع، حتى يتمكن كل فرد من معرفة حقوقه والاستفادة منها بشكل كامل.

□ يتضمن هذا الدليل:

الصفحة	المحتوي
٤	• <u>تسوية اوضاع بعض الممولين/ المكلفين طبقاً لأحكام للقانون رقم ٥ لسنة ٢٠٢٥</u>
١٢	• <u>بعض الحوافز والتسهيلات الضريبية للمشروعات التي لا يتجاوز حجم أعمالها السنوى ٢٠ مليون جنيه طبقاً لأحكام لقانون رقم ٦ لسنة ٢٠٢٥</u>
٢٥	• <u>تعديل بعض أحكام قانون الإجراءات الضريبية الموحد وفقاً للقانون رقم ٧ لسنة ٢٠٢٥</u>
٣١	• <u>الحوافز والتسهيلات الأخرى</u>
٤٧	• <u>الخاتمة</u>

تسوية أوضاع بعض الممولين / المكلفين

وفقاً للقانون رقم ٥ لسنة ٢٠٢٥

ما هو الجديد في القانون رقم (٥) لسنة ٢٠٢٥ ؟

- لو كنت بتمارس أى نشاط تجاري أو صناعي أو حتى نشاط مهني وخايف إنك تسجل في مصلحة الضرائب المصرية لأنك ممكن تتحاسب عن أرباح نشاطك خلال الفترة اللي فاتت.
- نحب نطمئنك إن ده مش هيحصل أبداً بعد تطبيق القانون الجديد لأن كل اللي فات من تاريخ ما بدأت تمارس نشاطك مش هتتحاسب عليه وهنعتبر إنك بدأت تمارس نشاطك من تاريخ العمل بالقانون، يعني شهادة ميلادك كممول/ مكلف هتكون من تاريخ بدء تطبيق القانون، وبتقدر تستفيد على مستوى كل أنواع الضرائب سواء ضريبة الدخل أو القيمة المضافة أو رسم تنمية الموارد المالية للدولة أو ضريبة الدمغة.

يعنى عفا الله عما سلف وإحنا ولاد النهاردة


ما هي الإجراءات المطلوبة للاستفادة من هذه الميزة؟

- هتقدم طلب للتسجيل بضرريبة الدخل وضرريبة القيمة المضافة بحسب حالات وجوب التسجيل في القيمة المضافة خلال ٣ شهور من تاريخ تطبيق القانون.
- هتقدم مستندات التسجيل في كل المنظومات الإلكترونية المطبقة بالمصلحة كمنظومة الفاتورة الضريبية الإلكترونية ومنظومة الإيصال الإلكتروني وفقاً لمراحل الإلزام.
- وتقدر تتعرف على إجراءات التسجيل في الفاتورة/ الإيصال الإلكتروني من خلال الأدلة الإرشادية الموجودة على الروابط التالية:

- <https://www.eta.gov.eg/ar/content/altsjyl-ly-mnzwmt-alfatwrt-alalktrwnyt>
- <https://www.eta.gov.eg/sites/default/files/٢٠٢٣-٠١/Taxpayers-Readiness-Guide-First Part-Arabic-v٢-٢٠٢٣.pdf>


في أي مزايا أخرى يوفرها القانون الجديد ؟

❑ لو كنت مقدم الإقرارات خلال هذه الفترات وحصل منك أي سهو أو خطأ أو في بيانات محتاج تضيفها.



❑ هتقدر تقدم إقرار معدل من غير توقيع أي عقوبة عليك أو مقابل تأخير أو ضريبة إضافية عن الفترة بين تقديم الإقرار الأصلي والإقرار المعدل، وحتى لو كنت مقدم الإقرار المعدل بعد الميعاد القانوني مش هيتحسب عليك لا مقابل تأخير ولا ضريبة إضافية.

❑ لو كنت مسجل فعلاً في المصلحة ولم تقدم إقرارات ضريبة الدخل أو إقرارات ضريبة القيمة المضافة عن أي فترة من الفترات الضريبية بداية من سنة ٢٠٢٠ وحتى الفترات السابقة على تاريخ العمل بالقانون.



❑ هتقدر تقدمها من غير أي عقوبات أو جزاءات مالية

وكل اللي مطلوب منك عشان تستفيد من الميزة دي إنك تقدم الإقرارات اللي إتكلما عنها خلال ٦ شهور من تاريخ تطبيق القانون

في أي مزايا أخرى يوفرها القانون الجديد ؟

من أهم المزايا التي تضمنها القانون الجديد إنه يقدم حلول مناسبة جدًا للممول/ المكلف للمنازعات السابقة على فترة ٢٠٢٠، حلول مش مرهقة أبدًا وبتساعده على تسوية وضعه الضريبي مع المصلحة.

حلول لكل الحالات سواء كان الفحص تقديري أو كان الفحص على أساس دفاتر وسجلات منتظمة.

لو تم الفحص تقديري وكان الممول/ المكلف مقدم إقرار بضريبة خلال فترة المنازعة يبقى كل المطلوب إنه يسدد ٣٠% من الضريبة المستحقة وفقًا للإقرار بالإضافة إلى ضريبة الإقرار عن كل فترة ضريبية في حالة عدم سدادها وفق الإقرار.

أما لو كان مافيش إقرار متقدم عن الفترة أو إقرار بدون ضريبة أو إقرار بخسائر تكون النسبة المطلوب سدادها ٤٠% من الربط النهائي السابق على فترة المنازعة بالإضافة إلى الضريبة المستحقة من واقع هذا الربط عن كل فترة ضريبية.

وهتقدر تقسط الضريبة ومقابل التأخير أو الضريبة الإضافية على ٤ أقساط ربع سنوية وتسدد القسط الأول خلال ٣ شهور من تاريخ المطالبة بالسداد بدون حساب مقابل تأخير أو ضريبة إضافية على التقسيط.

أما في حالة الفحص بناءً على دفاتر وحسابات منتظمة هيتم التجاوز عن ١٠٠% من مقابل التأخير أو الضريبة الإضافية والمبالغ الإضافية (زى المبالغ المستحقة بموجب المادة ٨٧ مكرر من القانون ٩١ لسنة ٢٠٠٥) بشرط الموافقة على آخر مطالبة وسداد أصل الضريبة خلال ٣ شهور من تاريخ تقديم طلب إنهاء المنازعة.

ولو كان عندك
منازعة
ضريبية وعاوز
توصل لتسوية
وتقفل الفترة
الضريبية بحل
مناسب

ما هي الإجراءات المطلوبة للاستفادة من هذه الميزة؟

الموضوع في منتهى البساطة كل اللي عليك إنك ...

- تقدم طلب الكتروني من خلال موقع مصلحة الضرائب المصرية على النموذج الخاص بتسوية المنازعات خلال ٣ شهور من تاريخ تطبيق القانون.
- تقوم الأمورية بإخطار الجهة المنظور أمامها المنازعة خلال ٣٠ يوم من تاريخ الطلب سواء كانت لجنة داخلية أو لجنة الطعن أو المحكمة، ويتم إيقاف نظر المنازعة لمدة ٣ شهور من تاريخ العرض على رئيس اللجنة أو رئيس المحكمة.
- تنتهي المنازعة بقوة القانون بمجرد إخطار اللجنة أو المحكمة بسداد الضريبة المستحقة عن فترة النزاع.

هل القانون يقدم أى مزايا بالنسبة للتصرفات العقارية أو التصرف في الأوراق المالية غير المقيدة بالبورصة؟

- أكد القانون تضمن مزايا هيستفيد منها الأشخاص الطبيعيين التي مش بيمارسوا أى نشاط خاضع للضريبة وقاموا بالتصرف في عقار أو باعوا أوراق مالية غير مقيدة بالبورصة خلال الـ ٥ سنوات السابقة على تطبيق القانون، وكل المطلوب منهم تقديم طلب محاسبية وسداد الضريبة المُستحقة على التصرف خلال ٦ شهور من تاريخ تطبيق القانون، وهيثم التجاوز عن ١٠٠% من مقابل التأخير.
- والميزة دي هيستفيد منها الشخص سواء كان في منازعة على الضريبة أو بدون منازعة، بس طبعًا لو في منازعة هيبقى مطلوب تقديم طلب تسوية منازعة زى الحالات اللي إتكلنا عنها قبل كده.
- أما لو فات على تاريخ التصرف أكثر من ٥ سنين من تاريخ صدور القانون ومفيش أي مطالبة من المصلحة بخصوصه مش هيستحق على التصرف أي ضريبة.

بإختصار عزيزى الممول/ المكلف

القانون الجديد يمثّل فعلاً فرصة حقيقية لكل واحد بيمارس نشاط خارج الاقتصاد الرسمي إنه يقوم بالتسجيل في مصلحة الضرائب المصرية ويدخل المنظومة الرسمية ويستفيد بكل المزايا الضريبية التي تقرها القوانين الضريبية المختلفة.

وفرصة لكل ممول/ مكلف لم يقدم إقرارات أصلية أو معدلة خلال الفترة السابقة أو عنده منازعة ضريبية محتاج يسويها بدون أعباء ضريبية كبيرة ده غير تقسيط الضريبة وكمان تقسيط مقابل التأخير والضريبة الإضافية أو التجاوز عنهم والمزايا الكثير اللي إتكلّمنا عنها واللي هتفتح صفحة جديدة مع مصلحة الضرائب المصرية ، صفحة كلها شفافية وثقة وتعاون .

بعض الحوافز والتسهيلات الضريبية للمشروعات التي لا يتجاوز حجم أعمالها السنوي

٢٠ مليون جنيه


وفقاً للقانون رقم ٦ لسنة ٢٠٢٥

□ خلينا نتفق إن الضرائب مش ضدك ، الضرائب معاك خصوصًا لو إنت لسه هتبدأ نشاطك أو حجم أعمالك صغير، وتعالى أقولك على الحوافز والتسهيلات اللي قررها القانون الجديد للمشروعات اللي حجم أعمالها لا يتجاوز ٢٠ مليون جنيه في السنة عشان نشجع المشروعات دي إنها تبدأ وتكمل وتكبر.

هو في قانون جديد خاص بالمشروعات اللي لا يتجاوز حجم أعمالها ٢٠ مليون جنيه ؟

أيوه ... في قانون جديد .. وقبل ما ندخل في التفاصيل ، بنفكرك دايمًا إن شعارنا في المرحلة دي إن المصلحة والممول شركاء ... وهنبدأ معًا صفحة جديدة.

هل هذه التيسيرات لضريبة
الدخل فقط؟



لا طبعاً
دخل وتوزيعات ارباح
وأرباح رأسمالية
ورسم تنمية ودمغة
وقيمة مضافة كمان.

لو كان نشاطي محامى أو دكتور أو
أي مهنة حرة هل هيستفيد من
الحوافز والتيسيرات؟



كل الأنشطة المهنية سواء مسجلة
في الضرائب أو غير مسجلة
بتدخل في هذه التيسيرات
ولكن إنتبه:-

لو أنت غير مسجل لازم تسجل
نفسك في مصلحة الضرائب أولاً.

مين المستفيد من الحوافز
والتيسيرات الجديدة؟



كل الممولين المسجلين
الحاليين والجدد في أى
أنشطة لا يتجاوز حجم
أعمالها ٢٠ مليون
جنيه سنوياً...
هيقدرُوا يستفيدوا من
النظام الضريبي المتكامل

طيب هو لازم أقدم طلب للمأمورية ولا بيتنفذ تلقائي؟

□ لازم تقدم طلب طالما حجم أعمالك لا يجاوز ٢٠ مليون جنيه
لكن إنتبه في حاجات مهمة جداً لازم تعملها:

١. تقدم الإقرارات الضريبية في مواعيدها.
٢. تسجل في منظومة الفاتورة الإلكترونية، منظومة الإيصال الإلكتروني طبقاً لمراحل الإلزام وإصدار الفواتير والإيصالات المقررة.

هيتم إزاي تحديد حجم أعمالى ؟

هيتم تحديد حجم الأعمال بطريقة بسيطة كالتالى:

١. من بيانات آخر ربط ضريبي نهائي فى تاريخ العمل بهذا القانون لو إنت مسجل ضريبياً.

طبعا هتسألني آخر ربط نهائي زي إيه ؟

يعني موافقة على الفحص اوقرار لجنة داخلية بالإتفاق أو قرار لجنة طعن أو حكم محكمة.

٢. بيانات آخر إقرار ضريبي قدمته لو إنت مسجل فى المصلحة ولم يتم محاسبتك ضريبياً حتى تاريخ العمل بهذا القانون.

٣. بيانات الإقرار اللى هتقدمه بعد التسجيل اعتباراً من تاريخ العمل بالقانون، وبيانات الإقرار هنا المقصود بها مش الإقرار الضريبي المتعارف عليه ولكن افادة منك برقم الاعمال المتوقع خلال السنة الأولى.

٤. البيانات المتاحة من خلال منظومة الفاتورة الإلكترونية أو الإيصال الإلكتروني .

طيب لو أنا غير مسجل في مصلحة الضرائب في مشكلة؟

□ ما فيش مشكلة طالما سجلت نفسك وفتحت ملف ضريبي
والتزمت بالفاتورة الإلكترونية أو الإيصال الإلكتروني وقدمت
الإقرارات الضريبية في مواعيدها

هي الحوافز والتيسيرات الضريبية الجديدة دي عبارة عن إيه؟

٤

لو كنت شركة وبتعمل توزيعات أرباح انت غير مطالب بدفع أي ضريبة عليها

٣

لو بعت أي أصل ثابت عندك (آلة أو أثاث أو سيارة مثلاً) انت غير مطالب بدفع أي ضريبة على الأرباح الرأسمالية.

٢

انت غير مطالب بدفع أي رسوم لعقود تسجيل الأراضي اللي المشروع هيتعمل عليها.

١

انت غير مطالب بدفع ضريبة دمغة أو رسم تنمية موارد مالية ولا رسوم توثيق وشهر لأي عقد تأسيس شركة أو عقود التسهيلات الائتمانية أو الرهن المرتبطة بنشاطك.

خلى بالك

في حالات مش هتستفيد بالتسهيلات دي



- أنشطة الإستشارات المهنية التي يتحقق ٩٠% على الأقل من حجم اعمالها السنوى من تقديم إستشارات مهنية لشخص او شخصين.
- أى مشروع يحاول القيام بأى فعل للدخول فى التيسيرات بدون وجه حق زى تقسيم النشاط بدون مبرر اقتصادي.

استفسارات ؟

□ لا طبعاً لا يمكن الخروج من هذا النظام المبسط قبل مرور خمس سنوات تبدأ من اليوم التالي لتقديمك لطلب الإستفادة

هل ممكن الرجوع في طلب الانضمام للتسهيلات ؟

□ طبعاً لو خرجت من النظام ده برغبتك بعد الخمس سنين ما فيش أي مشكلة وبتحاسب زي ما قانون الضرائب بيقول
□ اللي هو قانون ٩١ لسنة ٢٠٠٥، قانون ٦٧ لسنة ٢٠١٦ وقانون ١١١ لسنة ١٩٨٠ وكذلك قانون ١٤٧ لسنة ١٩٨٤

طيب لو خرجت منها بعد الخمس سنين هتحاسبوني ازاي ؟

استفسارات ؟

□ هل تقدم إقرار القيمة المضافة ربع سنوي بدايةً من الربع التالي للانضمام للنظام يعنى ٤ مرات فقط في العام، وهل تقدم خلال الشهر التالي لانتهاء مدة الـ ٣ شهور ويكون مصحوب بالسداد.

إقرار ضريبية القيمة المضافة
هل تقدم كل شهر ولا في تغيير ؟

□ أنت غير مطالب في ظل هذا القانون بتقديم نموذج السداد الشهري او إقرار ربع سنوي زي الوضع السابق ولكن هل تقوم بتقديم التسوية السنوية فقط خلال شهر يناير من العام التالي

وبالنسبة لإقرارات المرتبات
إزاي ه يتم تقديمها ؟

وبكده ه يتم المحافظة على السيولة النقدية للمنشأة

طيب انا كده فهمت... إزاي هيتم حساب ضريبة الدخل؟

□ أبسطها لك في صورة جدول يفهمك الموضوع أكثر

سعر الضريبة	حجم الأعمال السنوى
٠,٤% من حجم الأعمال	أقل من ٥٠٠,٠٠٠ جنيه
٠,٥% من حجم الأعمال	٥٠٠,٠٠٠ جنيه حتى أقل من ٢,٠٠٠,٠٠٠ جنيه
٠,٧٥% من حجم الأعمال	٢,٠٠٠,٠٠٠ جنيه حتى أقل من ٣,٠٠٠,٠٠٠ جنيه
١% من حجم الأعمال	٣,٠٠٠,٠٠٠ جنيه حتى أقل من ١٠,٠٠٠,٠٠٠ جنيه
١,٥% من حجم الأعمال	١٠,٠٠٠,٠٠٠ جنيه حتى ٢٠,٠٠٠,٠٠٠ جنيه

افرض إن حجم أعمالى لا يتجاوز ٢٠ مليون جنيه لكن فى سنة حجم أعمالى زاد هيجصل إيه ؟

□ خلال الخمس سنوات اللي قولنا عليها لو حجم أعمالك زاد فى حدود ٢٠% يعنى فى حدود ٤ مليون جنيه يعنى بحد أقصى ٢٤ مليون جنيه ما فيش مشكلة هتفضل معانا وفقاً لسعر الضريبة ١,٥% من حجم الأعمال

□ ولكن لو زاد أكثر من ٤ مليون جنيه أو أكررت الزيادة أكثر من مرة خلال الخمس سنوات

□ بكده يكون مشروعك نجح وكبر وهتتاسب من أول السنة التالية وفقاً لقانون الضريبة على الدخل رقم ٩١ لسنة ٢٠٠٥ وقانون القيمة المضافة رقم ٦٧ لسنة ٢٠١٦ وقانون ضريبة الدمغة رقم ١١١ لسنة ١٩٨٠ وقانون رسم تنمية الموارد المالية للدولة رقم ١٤٧ لسنة ١٩٨٤.

استفسارات ؟

هل سيتم الفحص كل سنة ولا
الوضع هيبقى إيه ؟

□ الفحص هيتم بعد مرور خمس سنوات كاملة من تاريخ
تقديمك طلب الاستفادة.

هل لازم يتم إمساك دفاتر
منتظمة ؟

□ مجرد دفاتر مبسطة جداً مش هتتعبك هيتم تحديدها
بقرار يصدر من وزير المالية.

هل أنا ملزم بنظام الخصم أو
الدفعات المقدمة ؟

□ التسهيلات بتعفي من تطبيق نظام الخصم أو الدفعات
المقدمة تحت حساب الضريبة.

وأحب أعرفك إن كل التسهيلات والحوافز الخاصة بالمشروعات اللي حجم أعمالها
لا يتجاوز ٢٠ مليون جنيه هتبدأ المصلحة في تطبيقها اعتباراً من ١/٣/٢٠٢٥



تعديل بعض أحكام قانون الإجراءات الضريبية الموحد

وفقاً للقانون رقم ٧ لسنة ٢٠٢٥

هل قدم القانون الجديد أى مزايا بخصوص مقابل التأخير والضريبة الإضافية؟

□ **بالإضافة لكل التسهيلات التي إتكلنا عنها.....** القانون الجديد تضمن ميزة مهمة جداً للممول/ المكلف هتخفف عليه جزء كبير من عبء مقابل التأخير أو الضريبة الإضافية التي في حالات كثير بتزيد عن أصل الضريبة نفسها عن الفترات الضريبية التي مر عليها سنوات طويلة، ويقوم الممول/ المكلف بسداد أصل الضريبة ويتعثر في سداد مقابل التأخير أو الضريبة الإضافية **وحلاً للمشكلة نص القانون الجديد على إن مقابل التأخير أو الضريبة الإضافية لن يتجاوز أصل الضريبة مهما كان تاريخ الفترة الضريبية.....** يعنى هنعسب مقابل التأخير أو الضريبة الإضافية لحد ما توصل لأصل دين الضريبة الغير مسدد من غير ما تتجاوز أصل دين الضريبة، وده هيساعد كثير من الممولين/ المكلفين على سداد المديونيات المستحقة عليهم بالكامل.

التصالح في المخالفات الإجرائية التي لا تتضمن مستحقات ضريبية

من أهم هذه المخالفات:

- عدم تقديم الإقرارات الصفرية في المواعيد القانونية او تقديمها بعد الميعاد.
- عدم الإحتفاظ بالدفاتر والسجلات خلال المدة القانونية.
- عدم الإنضمام لمنظومة الفاتورة الإلكترونية والإيصال الإلكتروني طبقاً لمراحل الإلزام.
- عدم الإخطار بالتغيير في البيانات خلال المدة القانونية.

التصالح في المخالفات الإجرائية التي لا تتضمن مستحقات ضريبية

الهدف من التعديل

قبل تعديل القانون كثير من الممولين/ المكلفين واجه مشكلة كبيرة في التصالح في كل المخالفات التي مش موجود فيها مستحقات ضريبية زى المخالفات السابقة، وسبب المشكلة إن التصالح بيتحسب على أساس قيمة الضريبة المستحقة ، وده طبعًا كان بيتجاهل الفرق بين المخالفات البسيطة زى المخالفات الإجرائية وحالات التهرب الضريبي اللي خطورتها أكبر بكثير.

وكان من أكثر المخالفات اللي بتتكرر حالات عدم تقديم الإقرارات الصفريّة أو تقديمها بعد الميعاد وكان المطلوب من الممول/ المكلف إنه يتصالح بدفع مبالغ ضخمة بالرغم من عدم وجود ضريبة مستحقة بالإقرار، وبالتالي كان في شعور بعدم العدالة أدى إلى عدم التصالح في مخالفات عدم تقديم الإقرارات الصفريّة أو تقديمها بعد الميعاد **وكان لازم يبقى في تدخل سريع لحل المشكلة اللي كانت بتمثل عبء كبير على الممولين/ المكلفين.**

مقابل التصالح في مخالفات التأخر في تقديم الإقرارات بدون ضريبة

على سبيل المثال:

مقابل التصالح بعد التعديل	مقابل التصالح قبل التعديل
من ١٥٠٠ جنيه إلى ٦٠٠٠ جنيه	١٦٦٠٠ جنيه
من ٣٠٠٠ جنيه إلى ٩٠٠٠ جنيه	٣٣٣٠٠ جنيه
من ٢٥٠٠٠ جنيه إلى ١٠٠٠٠٠ جنيه	٦٦٦,٠٠٠ جنيه
من ٥٠٠٠٠ جنيه إلى ١٥٠٠٠٠ جنيه	١,٣٣٠,٠٠٠ جنيه

أکید الفرق کبیبیر بین الوجود السابق والوجود بعد التعديل وأکید ده هیشجع کثیر من الممولین/ المکلفین على التصالح في مخالفات التأخر في تقديم الإقرارات بدون ضريبة والتي نتمنى إنها تختفي نهائياً ويتم تقديم الإقرارات في مواعيدها القانونية.

التصالح في مخالفة المادة ١٣٥ من قانون ٩١ لسنة ٢٠٠٥

والخاصة بالامتناع عن تطبيق نظام استقطاع وخضم وتحصيل وتوريد الضريبة في المواعيد القانونية

بعد التعديل	قبل التعديل
<p>أصبح التصالح أيسر بكثير وأخف على الممولين لأن النسبة المطلوب سدادها أصبحت ١٢,٥% من المبالغ غير المستقطعة أو غير المخصومة أو غير المحصلة أو غير الموردة بالإضافة الى أصل المبالغ ومقابل التأخير ودى نسبة هتشجع على التصالح</p>	<p>كان التصالح يتم بسداد ١٠٠% ، ١٥٠% ، ١٧٥% بحسب الأحوال من المبالغ غير المستقطعة أو غير المخصومة أو غير المحصلة أو غير الموردة وطبعاً الممولين كانوا يفضلوا العقوبة على التصالح لأن نسبة العقوبة كانت ٢٥% من المبلغ</p>

وبالتعديل اللي إتكلمنا عنه نبقى وصلنا لحل مشاكل كبيرة تسببت في حالة من الرفض من الممولين اللي عندهم رغبة في التصالح مع المصلحة وتجنب إتخاذ الإجراءات القانونية ضدهم .

الحوافز والتسهيلات الأخرى

سمعنا إن فيه تسهيلات ثانية بتقدمها مصلحة الضرائب هي إيه؟

بالفعل فيه تيسيرات ثانية بتقدمها مصلحة الضرائب زي:

١. تطوير وحدة دعم المستثمرين.
٢. إنشاء وحدة الرأي المسبق.
٣. إنشاء وحدة الشكاوي
٤. تطوير بعض المنظومات الضريبية القائمة.

إيه هو دور وحدة دعم المستثمرين ؟

وحدة دعم المستثمرين:

هي التي بتصدر الآراء الفنية في كل اللي بيتعرض عليها من مشكلات تطبيق القوانين الضريبية ده بجانب متابعة تنفيذ الآراء دي داخل المصلحة.

ويمكن تلخص دورها في نقطتين:

- الرد على كل الإستفسارات والشكاوى اللي بيقدمها المستثمرين بخصوص المعوقات والمشكلات اللي بيقابلوها في تطبيق القوانين الضريبية والقوانين الأخرى المرتبطة بها وكمان بتصدر الآراء القانونية والتنفيذية.
- تطبيق الإجراءات التنفيذية اللازمة مع القطاعات المختصة بالمصلحة للقضاء على كل مشاكل التنفيذ وإعطاء أولوية للملتزمين.

إليه الجديد اللي عملته المصلحة لوحددة دعم المستثمرين ؟

- ميكنة نظام العمل بالوحدة.
- تزويد الوحدة بعدد كاف من الفنيين والإداريين المؤهلين من العاملين بالمصلحة بكل أنواع الضرائب.
- تنظيم العمل بالوحدة ليكون على ثلاث مستويات وهي: مستوى إعداد الدراسات ومستوى المراجعة ومستوى الاعتماد، عشان نضمن جودة ودقة وسرعة العمل بالوحدة.
- التنسيق الدائم مع الإدارة العامة لدعم المستثمرين بوزارة المالية وسرعة الرد وإتخاذ الإجراءات اللازمة للشكاوى الواردة.

إليه الخدمات الجديدة اللي هتقدمها الوحدة للمستثمرين ؟

- توفير المعلومات الدقيقة والمحدثة للمستثمرين من خلال قنوات كثيرة ومن خلال إعداد الأدلة الإرشادية ونشرها على الموقع الرسمي لمصلحة الضرائب المصرية وتحديثها بشكل مستمر.
- عقد لقاءات مستمرة وجلسات استماع مع المستثمرين بالتنسيق مع الإتحادات المختصة وجمعيات المستثمرين ومنظمات المجتمع المدني.
- منح أولوية للممولين الملتزمين ضريبياً في الإستفادة من الخدمات اللي هتقدمها الوحدة.
- توفير إيميل خاص بوحدة دعم المستثمرين وهو: ISU@eta.gov.eg

إيه هو دور وحدة الرأي المسبق؟

- بتوضح المعاملة الضريبية للتعاملات وبتعد الدراسات والبحوث الضريبية المطلوبة.
- بتساعد المستثمرين في عمل دراسات الجدوى لمشروعاتهم في إطار من الوضوح والشفافية والإلمام بأحكام القوانين الضريبية.
- بتصدر قرارات ملزمة للمصلحة بخصوص الموقف الضريبي لمعاملات الممولين/المكلفين.

و ده الإيميل الخاص بوحدة الرأي المسبق: Advance.Decs@eta.gov.eg

إيه هو دور وحدة الشكاوي ؟

□ تقوم الوحدة علي استقبال الشكاوي ومخاطبة الجهات المختصة داخل المصلحة لدراسة المشكلة وحلها واعداد الردود اللازمة علي كافة الشكاوي.

□ وتكون الاستفادة من خدمات الوحدة عن طريق الدخول علي الموقع الرسمي لمصلحة الضرائب المصرية : www.eta.gov.eg

وإيه هي المنظومات اللي تم تطويرها ؟

تم تطوير منظومات زي:

- منظومة المقاصة المركزية.
- منظومة رد الضريبة على القيمة المضافة.

إيه هو التطوير في منظومة المقاصة المركزية؟

□ عشان نساعدك انك تحافظ على السيولة اللي عندك فعلت وزارة المالية المنظومة دي لعمل التسويات اللازمة بين أي مبالغ مستحقة ليك وأي مبالغ مستحقة عليك عند أي مصلحة إيرادية تابعة لوزارة المالية.

مش بس كده

□ كمان بنتوسع في تطبيقها لتشمل العديد من الجهات الإدارية في الدولة زي مبالغ دعم الصادرات ومديونيات الممول طرف مصلحة الضرائب المصرية.

وكده نبقى وفرنا لك وقت وسيولة نقدية

إيه هي التسهيلات التي تمت في منظومة رد الضريبة على القيمة المضافة؟

□ تم تطوير وتحسين المنظومة لتوفير السيولة المالية اللازمة للمشروعات
بسرعة أكبر عن طريق الإجراءات لتقليل الوقت اللازم لعملية الرد.

هي دي كل التيسيرات اللي وفرتها مصلحة الضرائب ولا فيه حاجة تانية؟

لا خد عندك كمان المصلحة عملت:

- تيسيرات على عملية تسعير المعاملات
- التوسع في نظام الفحص بالعينة ليشمل كل المراكز الضريبية والمأموريات
- تبسيط الإقرارات الضريبية
- النشر المسبق للمستندات المطلوبة للفحص الضريبي
- إلغاء الإقرارات غير المؤيدة مستندياً مرحلياً

إيه هي التيسيرات الجديدة التي تمت على عملية تسعير المعاملات؟

- ه يتم رفع الحد الأدنى لتقديم دراسة تسعير المعاملات (ملف رئيسي – ملف محلي) من ١٥ مليون جنيه إلى ٣٠ مليون جنيه مصري وده هيووفر لك فوائد كثير منها تخفيف الأعباء – توفير التكاليف – إلغاء التزامات دراسة التسعير.
- تقديم المستندات المنصوص عليها في المادة ١٢ من قانون الإجراءات الضريبية الموحد رقم ٢٠٦ لسنة ٢٠٢٠ عن الفترات الضريبية بدايةً من سنة ٢٠٢٠ وحتى الفترات السابقة على تاريخ العمل بالقانون دون اى جزاءات مالية.

إيه الميزة من التوسع في نظام الفحص بالعينة؟

توسعت المصلحة في نظام الفحص بالعينة ليشمل كل المراكز الضريبية والمأموريات عشان:

- تخفيف الأعباء وتقليل تكاليف الالتزام.
- تعزيز الثقة بين المصلحة والممولين واعتبار الإقرار ربط ذاتي.
- عدم خضوع كافة الممولين للفحص الضريبي بشكل سنوي.
- هتكون العينة وفقاً لمنظومة مخاطر حديثة ومناسبة لحجم وطاقة القوى الفنية لمنع تراكم الملفات والنزاعات.

إليه المقصود بتبسيط الإقرارات ؟

لأن الإقرار الضريبي هو واحد من أهم التزامات الممولين/ المكلفين
فكان لازم التسهيلات الجديدة تبسط نماذج الإقرارات وتقلل عدد صفحاتها
خلال المرحلة القادمة، وده أكيد يخفف كثير من أعباء إعداد الإقرار لأن
معظم البيانات الخاصة بتعاملاتهم متاحة حالياً للمصلحة عن طريق
المنظومات الإلكترونية زي الفاتورة الإلكترونية والإيصال الإلكتروني.

خد بالك.... في كمان نشر مسبق للمستندات المطلوبة للفحص

النشر المسبق للمستندات المطلوبة للفحص الضريبي خطوة مهمة

- لتوفير الوقت والجهد ومنح الفرصة لتجهيز المستندات لعملية الفحص قبلها بوقت كاف.
- تقديم المستندات مرة واحدة بدل من تكرار تقديمها في كل الأوعية الضريبية.

وفيه كمان إلغاء للإقرارات غير المؤيدة مستندياً مرحلياً

وذلك عن الإقرارات الضريبية لعام ٢٠٢٥ بالنسبة للأشخاص الاعتبارية، والإقرارات الضريبية لعام ٢٠٢٦ بالنسبة للأشخاص الطبيعيين بغرض تطبيق نظام الفحص بالعينة على كافة الإقرارات وتخفيف أعباء الفحص، والقضاء على أي تقديرات جزافية أو خلافات أو تباين في الآراء ووجهات النظر.

وكمان المصلحة عملت حاجة مهمة جداً

□ وضعت أنظمة استقصاءات رأي محايدة وده عشان:

- نعرف مدى رضا الممولين عن خدمات المصلحة من خلال **جهات محايدة** ونقدر نصح المسار بشكل منتظم ومستمر.

□ وضعت أدلة إرشادية زي:

- أ- أدلة إرشادية للفحص بحسب النشاط: عشان نوحد قواعد وطريقة الفحص الضريبي على مستوى كل مأموريات المصلحة.
- ب- أدلة إرشادية تتضمن: حقوق وواجبات المستثمرين وكل الحوافز والمزايا الواردة بالقوانين الضريبية والقوانين ذات الصلة عشان نحقق الوعي اللازم والدراية الكاملة لكل ما تتضمنه التشريعات الضريبية.

بجانب تلك التسهيلات

واستكمالاً لإستراتيجية وزارة المالية للميكنة والتحول الرقمي

□ تم إطلاق منظومة توحيد أسس ومعايير احتساب ضريبة الأجور والمرتبات في يناير ٢٠٢٣، وهي واحدة من أهم مشروعات تطوير مصلحة الضرائب المصرية، ويتقوم على إنشاء منصة موحدة سيتم من خلالها احتساب الضرائب المستحقة على المرتبات وما في حكمها بطريقة آلية وموحدة لكل العاملين في كل قطاعات الدولة، والهدف منها العمل على الحد من وجود فروق الفحص عن طريق زيادة الدقة والالتزام في حساب وسداد الضريبة، وكمان بتوفر إمكانية إصدار بيان مفردات الأجور والمرتبات للموظفين عن طريق المنظومة.

• خطوات إنشاء حساب والدخول على المنظومة اضغط هنا

https://www.eta.gov.eg/sites/default/files/٢٠٢٤-٠٧/uptcp-non_core_taxpayer_enroll_guide-٢٠٢٤-٠٧-١٤.pdf

• ولمزيد من المعلومات عن المنظومة يتم زيارة موقع مصلحة الضرائب المصرية

<https://www.eta.gov.eg/ar/content/payroll-services>

وفي الختام.....

بناكد على إن الحوافز والتيسيرات الضريبية فرصة حقيقية لكل شخص خائف ينضم للمنظومة الرسمية ويسجل في مصلحة الضرائب المصرية، أو كل ممول/ مكلف محتاج ثقة وإحساس أكثر بالعدالة الضريبية، وبإن منازعاته مع المصلحة ممكن تتحل بأبسط الإجراءات وفي أسرع وقت وبدون عقوبات أو غرامات، وأنه ممكن يستفيد من نظام ضريبي متكامل في منتهى الوضوح والبساطة وبدون أي أعباء مرهقة للممول/ المكلف، نظام يشجع على الإستثمار ونمو المشروعات الصغيرة والمتناهية الصغر.

الحوافز والتسهيلات الجديدة هي الأولى ومش هتكون الأخيرة، وبندعوا كل الممولين/ المكلفين لمتابعة المستجدات والخدمات اللي بتقدمها مصلحة الضرائب المصرية لتحقيق المزيد من الثقة والشفافية والعدالة في المجتمع الضريبي.

ودايماً بنقولك إن إلتزامك النهاردة ... إستقرارك في المستقبل.

مع تحيات مصلحة الضرائب المصرية قطاع الموارد البشرية